

# «Mintgatant vai era svelto da decider»

La directura partenta dad RTR, Ladina Heimgartner, lascha encrescher per sia squadra dad RTR

CUN LADINA HEIMGARTNER HA DISCURRI  
AUGUSTIN BEELI / ANR

■ **Cun la fin da l'onn 2019 banduna Ladina Heimgartner la chasa RTR a Cui-ra. Sco successura da Mariano Tschuor ha l'Engiadinaisa influenzà ferm la transfurmaziun digitala dals meds.** La gronda sfida da la votaziun dal pievel l'onn 2018 ha ella dumagnà suveranain. Per la Rumantschia ha Ladina Heimgartner pudì sa profilar sin champ naziunal. Ella avess pudì far carriera, ha dentant renunzià. Ussa la midada d'opiniun. Il CEO da Ringier, Marc Walder, dovra ella en ses concern da medias.

**Cun la fin da l'onn 2020 bandunais Vos RTR. Quai è in termin detg curt. In post da la direcziun ha in temp da visada dad almain in mez onn. Co pudais Vos partir uschè svelto?**

**Ladina Heimgartner:** Quai è tut normal ch'ins sa cunvegn cun il patrun actual sin ina data d'extrada e ch'ins parta gia avant ch'ils sis mais èn passads. Suenter l'abdicaziun datti adina novs temas e decisziuns che spetgan e che pertutgan il futur d'in'interpresa. La tendenza da franar u spustar decisziuns che na pertutgan betg pli il temp d'uffizi na fa bain ni a mai ni a l'interpresa. Perquai èsi bun per omadus sche la separaziun succeda avant. Mes schef actual ed jau avain qua exact la medema tenuta.

**Suenter la votaziun No Billag il zercladur 2018 avessas Vos pudì surprender insaquants posts interessants. Vos avais desistì ed essas restada directura dad RTR. Pertge ussa questa midada rapida?**

Quella giada – sco dil reminent er anc oz – sun jau fitg cuntenta cun mia plazza sco directura dad RTR. Ma la plazza tar Ringier è in'opportunitad ch'ha persvas tant a mes venter sco er a mes chau e sch'i dat talas opportunitads èsi da prender quellas. Alura vai mintgatant era svelto.



Ladina Heimgartner va en il futur a Turitg, e betg pli a Berna.

FOTO RTR

**Marc Walder, il CEO da Ringier, sto avair fatg ina fitg buna offerta a Vos?**

Nossas ideas eran da l'entschatta davent fitg datiers ina da l'autra. Il pachet cumplet constat, gea.

**Vos daventais commembra da la direcziun da Ringier. Sco scheffà da la nova partiziun «Corporate Center» sorprendais Vos in post plitost administrativ. U n'è quai betg uschia?**

Dapi ch'jau hai bandunà il microfon,

Mes biro hai jau anc betg vis, ma el vegn ad esser en il center da pressa da la Ringier SA a la via Dufour a Turitg. Sur da mes mintgadi na poss jau anc betg dir bler, ma jau quint ch'el vegn magari chargià e multifar.

**Ringier è conuschent per sias medias da boulevard, «Blick», «Glücks-Post», «Schweizer Illustrierte» euv. En l'avegnir represchentais Vos tut in'otra «corporate identity». Èsi in'otra qualidad schurnalistica u in'otra «liga»?**

La Ringier SA ha in vast portfolio da gasettas, magazins – tranter auter dal rest era il «Beobachter» u la «Handelszeitung», sco era servetschs digital e quai en 19 pajais. Da l'autra vart investescha Ringier – sco ina da las paucas chasas da medias Svizras – en il schurnalisme. Ringier è pia ina firma interessanta che funcziuna natiralmain auter che la SSR sco chasa da medias publica, ma gist questa midada ma fascinescha.

**Sa mida insatge per Vos pertutgand la strategia da digitalisaziun che Vos avais promovì fitg tar RTR?**

La digitalisaziun è ina realitad e per mintga interpresa – oravant tut era da medias – la gronda prioritad strategica. Tar RTR avain nus fatg gronds ed impurtants pass en quella direcziun – quel svilup vegn a cuntinuar. Mias e mes collegas fan grondiusa lavur e jau schess che nus avain ina da las pli fermas purschidas medialas online da tut la SSR. Ringier è probabel la chasa da medias Svizra la pli avanzada en la transfurmaziun digitala sin nivel naziunal che gioga perfin en la liga europea.

**Na vegnan il pled e l'affecziun per il linguatg rumantsch betg a mancar en Voss futur mintgadi professional?**

Natiralmain – ed i vegn a dar anc bler auter che vegn a mancar a mai, oravant tut natiralmain mia squadra RTR qua a Cui-ra.

## La qualificaziun è centrala

«Uschè bain umens sco dunnas èn tschertgads», punctuescha il president dal cussegl da la societad purtadra SRG-R, Vincent Augustin. Sin dumonda da l'anr conferma el ch'ins scriveva ora proximamain la plazza da la directura partenta Ladina Heimgartner. El di ch'ins vegnia a tschertgar e seleccziunar la persuna la pli cumpetenta per il post. «Ni la schlattaina, ni la regiun èn decisivas», conceda Augustin. Durant bunamain in tschientaner hajan ins adina dà paisa principala ad in equiliber da las regiuns. Sursilvan, ladin, surmiran u sutsilvan n'è dentant betg decisiv tar la seleccziun da la persuna ch'occupescha davent da l'onn proxim il post da directur u directura RTR. Il president dal cussegl SRG-R refusa ch'ins tschertgia en emprima lingia ina persuna feminina e ch'ins dettia pais a la quota da dunnas. Impurtant è per

Augustin che la nova directura u il nov directur vegnia ad esser ina persuna abla da cuntinuar cun la transfurmaziun digitala. Criteri central è la vasta qualificaziun cun cumpetenzas en management, comunicaziun, administraziun ed era tecnica. La nova directura u il nov directur vegn ad entrar en plazza la primavaira 2020, il termin exact dependa cura che la persuna po esser a disposiziun. Augustin accentuescha entant ch'il cussegl dad RTR n'è betg il gremi d'elecziun, il cussegl maina bain la procedura da tschertga e preselecziun, preschenta dentant sia proposta al cussegl general da la SRG SSR idee suisse. Quel elegia la finala la nova directura u il nov directur dad RTR. Evidentamain vegni ad esser ina persuna ch'ademplescha in auter criteri central: Ella sto discurre e scriver rumantsch.

**Co pon ins s'imaginar Vossa lavur da mintgadi, e nua è Voss biro?**